



UNIVERSITÄTS-
BIBLIOTHEK
PADERBORN

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

Ethicè.

[urn:nbn:de:hbz:466:1-68709](#)

dignationem incurrit; & miser ipse, liberique funestam necem subierunt. Verè Aristophanes; nulla fera minùs expugnabilis quàm femina. Summa ibi contumacia, si cedendum; si verba & fraudes componendæ, summa astutia; si coquenda vindicta, maxima vigilantia. Neque imbecillis tantùm & impar laboribus hic sexus est: sed, si licentia adsit, sœvus, ambitiosus, potestatis avidus, omnium rerum libertatem, imò licentiam, si vera dicere volumus, desiderat, inquit Tacitus. Et Poëta in veteri Comœdia.

Malè quod mulier facere incipit, nisi efficere perpetrat,
Id illi morbo, id illi senio est: ea illi miseriae miseria;
Si bene facere incipit, eius eam citò odium percipit.

SYMBOLVM XXXIV.

Amphion cantu fidium Thebas urbem ædificat.

Homerus Odyss. μ.

Ethicè.

1. Princeps amabilis. 2. Concordia civium. 3. Cithara, hieroglyphicum boni Principis.

Fuit is Jovis ex Antiopa, Lyci Regis Thebani, filia proles, Thebærum & ipse rex, non sceptro magis, quàm plectro potens & clarus. Vxor ei fuit Niobe, mulier superba & imperiosa, quæ cotis instar virtutem & patientiam mariti acuebat, de qua in præcedente Symbolo. Citharam *Amphion* ab ipso Mercurio ejus inventore, accepit; quam, sicut alia instrumenta musica, tanta suavitate pulsavit, ut, cum Thebæ in Bæotia, non satis adversus finitimos hostes essent instructæ turribus ac propugnaculis, ipse mellito fidium sono saxa quoque commoverit, & ad urbis Thebanæ constructionem attraxerit. Illa quippe dulcissimo modulatu duritatem suam ponere, & velut animata essent, loco se movere; primoque grandiora in fundamentum intrare; deinde paulò minores lapides, leni motione confluere, aliquique super alios subsilientes, ultro coēunte junctura, consurgere; demum crescente numero, partim summam in altitudinem sese attollere, partim in propugnacula, ad vim quamcunque repellendam, protuberare cœperunt. Muros septemgemi-

Z

næ



næ distinxerunt portæ, tot scilicet, quo in cithara Amphionis chordæ, & in chordis vocum discrimina. De quibus Maro 6. Æneid. Orpheum describens :

Nec non Threicias longa cum veste sacerdos
Obloquitur numeris septem discrimina vocum

Ethica.

I. (4) Quemadmodum cithara constat è summis, medijs, infimis fidibus, & ipsa chordarum inæqualitate, concinnam & concordem reddit harmoniam, si perita manus rectè eas composuerit, & impulerit. Eodem modo res publica, è diversis hominum conflata generibus, & ordine dissimili, concordi pace ligatur, si Principem nacta fuerit, qui & consilio, & rerum usu valeat, quique benevolentiam suorum, consensum, & commune pacis vinculum fovere nōrit. Ejus rei imago fuit Amphion, de quo Horatius in arte Poëtica :

Dictus & Amphion Thebanæ conditor arcis
Saxa movere sono testudinis, & prece blanda.

Nihil enim ad permovendos hominum animos efficacius, quam morum amabilitas; (quæ per dulcem citharæ sonum designatur) nam ut Tacitus ait lib. 11. Annal. Princeps amorem apud populares, metum apud hostes querat. *Verbum dulce, inquit Siracides c. 6. multiplicat amicos, & mitigat inimicos.* ita quidem, ut cautes etiam & saxa, id est, cruda & saxe hominum corda suavitate sermonis demulcentur, & trahantur, uti traxit Amphion, de quo Poëta :

Movit Amphion lapides canendo.

Eloquentiâ namque suâ, & blanda oratione persuasit non tam lapidibus, quam duris hominibus, ut ulro confluenter, & operam navarent in moenibus Thebanis condendis. Hanc artem conciliandi animos Plutarchus docuit Imp. Trajanum, dum ad eum scripsit, *Leniter atque placide fides, non vi & impetu concuti debere.* Tullius quoque lib. 2. de Republ. concordiam, quam parit suavitas eloquij, comparat fidibus & concentui musico; Ut in fidibus, inquit, atque cantu ipso & vocibus concentus est quidam tenendus ex distinctis sonis, isque concentus ex dissimillimarum vocum moderatione, unus tamen efficitur, & congruens: sic summis, & infimis, & medijs interjectis ordinibus ut sonis, moderatæ natura civitatis concentu dissimillorum consistit; & quæ harmo-

(a) Princeps amabilis.

harmonia à musicis dicitur in cantu, ea est in civitate concordia, quæ sine justitia, nullo pacto esse potest. Ad Tullium accedit Plutarchus lib. de amicis. Musica, inquit, in cantu & organis, argutè quidem concors est, ex acutis, & medijs, & gravibus modis, quanquam sint dissimiles; ita firma amicitia non aliter, atque una anima in multis corporibus, æquabili ratione consistit.

II. (b) In hunc modum Thebarum mœnia exædificavit canorus Amphion, & adversus hostiles aggressiones communijt; quid enim validius ad propugnandum & tuendum, quam civium concordia? Hoc munimentum, fundatore Lycurgo, urbis Spartæ fuit. Vnde Agesilaus rex ibidem, rogatus à quodam, cur Sparta mœnibus non cingeretur? ostendit ei cives unanimes & armatos: Hi, inquit, sunt Spartanæ civitatis mœnia; significans, urbes nullo munimento tutiores esse, quam virtute civium consentientium. Plutarch. in apoph. Lacon. Rursum Lacedæmonij seu Spartani cùm de civitate mœnibus cingenda consultarent, Isæus Sophista recitavit illud Homeri:

Scutum hæsit scuto, galeæ galea, atque viro vir.

Addiditque: sic mihi state, Lacedæmonij, & muris cincti sumus. Illustrantur hæc exemplo Sciluri, regis Scytharum, qui octoginta filiorum pater, cum moriturus esset, fasciculum jaculatorum singulis porrexit, jussitque rumperem. Quod cùm illi fieri posse negassent, ipse singula jacula è fasciculo exemit, & confregit, filios admonens his verbis: si concordes eritis; validi, invictique manebitis: contrà, si dissidijs ac seditione distrahamini, imbecilles vos præbebitis, & expugnatu faciles. Simile de Micipsa Numidarum rege memorat Sallustius; qui jam jam è vita excessurus, filios paterno monuit affectu, ut concordes sint, addens: Concordia res parva crescunt, discordia maxima dilabuntur. Confirmat hæc omnia Salomon Prov. 18. Frater, qui adjuvatur à fratre, quasi civitas firma, & judicia, quasi vectes urbium. Videlicet concordia fratrum est instar urbis munitissimæ & inexpugnabilis; judicia verò, hoc est, lites & dissidia fratrum, sunt quasi vectes urbium seu fores, quæ per discordiam facile hostibus reserantur, & præbent aditum. Huc facit Symbolum Ottoberti Comitis Habsburgici, in quo Cithara sustinetur ab armato brachio, cum inscriptione: *Hæc mihi tuba. Quasi diceret: ad concordiam potius, quæ animorum est harmonia, quam ad arma vocabo. Vide Alciati emblema 10.*

III. (c) Possent per Amphionis citharam heptachordon intelligi

Z 2

septem

(b) Concordia circuum. (c) Cithara est hieroglyphicum boni Principis.

septem virtutes, maximè decentes Principem & exornantes; videlicet *Religio*, de qua Liv. lib. 5. Omnia prospera eveniunt colentibus Deos, adversa spernentibus. Et Aristoteles 6. Polit. Primum est curatio rerum divinarum. 2. *Justitia* de qua Cic. in paradox. Jus & æquitas sunt vincula civitatum. Et S. Aug. lib. 4. de Civ. Remota justitia, quid sunt regna, nisi latrocinia? Et Augustus apud Senecam in Lucullo: Pietate & justitia Principes Dij fiunt. 3. *Fortitudo*. Hieronymi dictum est: Fortitudo atque constantia via regia est, à qua declinat ad dextram, qui temerarius est & pertinax: ad sinistram, qui formidolosus est & pavidus. 4. *Prudentia*. Omnium temporum eventus docebit, & docuit, *plura in summa fortuna, auspicijs & consilijs, quam telis & manibus geri*. Tacitus. Et Euripides: Mens una sapiens, plurium vincit manus. 5. *Clementia*. Male timore veneratio acquiritur, longèque valenter amor ad obtainendum, quod velis, quam timor. Plin. epist. 8. Ciceronis sententiâ homines nulla re proprius accedunt ad Deum, quam salutem homini dando. Et Rudolphi Austriaci dictum est: severum fuisse pœnituit, placabilem nunquam. 6. *Liberalitas*. Quemadmodum fruges non tam ingenio soli, quam cœli beneficio, meliorèque temperie lætiūs exuberant: ita & meliores artes, eximiāque ingenia, benignitate, humanitatēque Principum virorum evocantur, & excitantur. Cleomenes & Ptolemæus reges Ægyptiorum adeò benefici erga cunctos extiterunt, ut inde beneficiorum cognomina reportarint, *Evergetæ* dicti. 7. *Temperantia*, seu moderatio cupiditatum; nam quomodo reget alios, qui se ipsum regere nescir? Latissimè dominatur, qui in se obtinet imperium. Alexandrum certè Magnum, quem arma Persarum non frangerant, vitia vicerunt, & animus cupiditatibus solutus.



SYM.